

Madurese - Agape Alketab - God's Love Letter Scriptures

Yahya 15:9 Akantha Rama se taresna ka Sengko', bariya keya Sengko' taresna ka ba'na. Ba'na kodu teptep odhi' menangka oreng se ekataresnae Sengko'.

Yesaya 43:1 Isra'il, areya' dhabuna PANGERAN, "Sengko' se nyepta'agi ban agabay ba'na, ja' tako', bi' Sengko' ba'na masthe epasalamet! Sengko' la ngolok nyamana ba'na, ba'na reya Tang andhi'.

Efesus 2:10 Sampeyan sareng kaula sadaja paneka cepta'anna Jehovah; sarta kalaban parantara'anna Isa Almasih Jehovah nyepta'agi sampeyan sareng kaula sopaja ngalakone pa-ponapa se sae se ampon esadhiya'agi kaangguy sampeyan sareng kaula sadaja.

Yeremiya 1:5 "Sabellunna Sengko' madaddi ba'na e gandhu'anna ebuna, ban sabellunna ba'na lahir, bi' Sengko' ba'na la epele epadaddi nabbi kaangguy sa-bangsa."

Galatia 1:15 Nangeng dhari kabecce'anna Jehovah, kaula sareng Jehovah epele sabellunna kaula lahir, sareng etembali epakona aladine Salerana.

Yahya 15:16 Banne ba'na se mele Sengko', tape Sengko' se mele ba'na, ban nyoro ba'na entar man-dha'emman sopaja ba'na abuwa lebba', iya areya buwa se ta' bisa mate. Daddi bi' Rama ba'na bakal eparengngana apa'a bai se epenta ba'na kalaban Tang nyama.

3 Yahya 1:2 kaula nyo'on ka Pangeran mogamoga sampeyan eparengngana baras ban ta' manggi alangan pa-ponapa, akadi sokmana sampeyan ta' manggi alangan pa-ponapa.

Yesaya 43:4 Ba'na reya aji e Tang mata, Sengko' ngargai ban taresna ka ba'na; daddi bi' Sengko' manossa ebagi menangka gantena ba'na, sa-bangsa menangka gantena nyabana ba'na.

1 Petrus 2:9,10 Nangeng sampeyan bangsa peleyan, mam-imam se aladine rato, bangsa se socce, malolo kaagunganna Jehovah, ommadda Jehovah dibi', se epele Jehovah ban etembali Jehovah epakalowar dhari pettengnga epamaso' ka dhalem tera'na Salerana se tar-kataran sopaja sampeyan mabalattra berta parkara sadajana lalakon raja se elampa'agi Salerana. 10 Gi' dhimen sampeyan banne ommadda Jehovah, tape samangken sampeyan ommadda. Gi' dhimen sampeyan ta' ekabellasi Jehovah, tape samangken sampeyan ampon narema bellas asena. 11 Tan-taretan sadaja, sampeyan paneka oreng manca e dunnya paneka.

Daddi kaula nyo'ona gu-onggu ka sampeyan, ja' norodi napsona manossa se ros-terrosan aperrang sareng sokma.

Yeremiya 31:3 dhari jauna Sengko' ngaton ka reng-oreng jareya. He ommat Isra'il, molae lamba' Sengko' ros-terrosan taresna ka ba'na, ban saterrossa Sengko' paggun noduwagiya ja' Sengko' teptep taresna ka ba'na.

Efesus 1:4 Sabellunna dunnya paneka ecepta'agi, Jehovah ampon mele sampeyan sareng kaula sadaja kalaban parantara'anna Almasih, sopaja sampeyan sareng kaula sadaja daddi kaagunganna Jehovah sacara kusus, ban tadha' calena e ajunanna.

2 Timotiyus 1:9 Jehovah masalamet sengko' ban ba'na epadaddiya ommadda dibi'. Banne polana sabarang lalakonna sengko' ban ba'na, tape adhasar ka rancanana Jehovah dibi' sarta rahmadda. Jehovah apareng rahmadda ka sengko' ban ba'na kalaban parantara'anna Isa Almasih sabellunna dunnya reya ecepta'agi.

Hoseya 11:8 PANGERAN adhabu, "He, Isra'il, bi' Sengko' ba'na ta' kera epanneng otaba edina'agi. Ba' bisa'a ba'na epaancora bi' Sengko' akantha Adma? Otaba epakantha Zebo'im? Sengko' ta' tega se kantha'a jareya sabab Tang kataresna'an ka ba'na talebat rajana!

Yahya 3:16 Sabab Jehovah reya talebat raja taresnana ka manossa e dunnya reya, sampe' marengngagi Pottrana se nonggal, sopaja pa'-sapa'a se parcaja ka Salerana ta' sampe'a mate, tape olle odhi' se saongguna tor langgeng.

Yesaya 49:15,16 PANGERAN ajawab, dhabuna, "Ba' bisa'a ebu se loppa ka ana'na, ban ta' neser ka ana'na dibi'? Maske badha ebu se loppa ka ana'na, Sengko' ta' loppa'a ka ba'na! 16 Yerusalim, Sengko' enga' terros ka ba'na; nyamana ba'na bi' Sengko' eoker e pa'-dapa'na Tang tanang.

Yesaya 41:13 Sabab Sengko' PANGERAN, Jehovahna ba'na nonton tanangnga ba'na se kangan; ca'na Sengko', 'Ta' osa tako', Sengko' nolongana ba'na.' "

Lukas 12:32 Ba'na se ta' saapa bannya'na reya, ta' osa tako'! Sabab Ramana ba'na kasokan marenge ba'na berkat dhari Pamarenta'anna.

Matiyus 28:20 Ajari kabbi sopaja padha'a ta'at ka pa-apa se la eparenta'agi Sengko' ka ba'na. Ban kaenga'e, ya, Sengko' abarengngana ba'na terros sampe' are keyamat.

Yahya 14:1 "Ba'na ta' osa kobater otaba ngalengsang," ca'na dhabuna Isa ka red-moredda. "Paparcaja ka Jehovah, ban paparcaja keya ka Sengko'.

Yesaya 41:14 Dhabuna PANGERAN, "Ella ja' tako', Isra'il, maske ba'na kene' ban ta' kowat. Sengko' PANGERAN se nolonge ba'na, Se Mahasocce,

Jehovahna Isra'il Panyalamedda ba'na.

Yesaya 43:2 Mon ba'na lebat e aeng otaba songay, bi' Sengko' ebarengngana, ba'na ta' kera tasellem e dhalem kasossa'anna. Mon ba'na lebat e apoy, ta' kera ekello', ta' kera calaka' polana coba se ra'-berra'.

Jabur 23:1-6 Jaburra Daud. PANGERAN reya se ngowan sengko', sengko' ta' kera kakorangan. 2 Bi' Pangeran sengko' epatedhung e talon se rebbana biru. Sengko' etonton bi' Pangeran ka aeng se ceddu. 3 Sengko' eparenge kakowadan se anyar, ban etonton ka jalan se teppa', menorot janjina. 4 Sanare abdidalem lebat e cora se petteng, GUSTE, abdidalem ta' tako' sakale ngadhebbi babaja, sabab Junandalem asarengnge abdidalem. Sabab Junandalem ajaga abdidalem akadi oreng ngowan se ajaga dumbana sareng tongket ban gadana. 5 Junandalem nyadhiya'agi pesta kaangguy abdidalem e adha'annepon moso abdidalem. Sareng Junandalem abdidalem etarema epakadi tamoy raja se molja. Sareng Junandalem abdidalem eparenge nom-enoman se sae talebat bannya'na. 6 Abdidalem oneng Junandalem sae ka abdidalem, sareng taresna ka abdidalem salanjangnga; abdidalem eedine saomorra ngennengnge kalenggiyannepon Junandalem.

Yahya 10:11 Sengko' reya oreng ngowan se becce'. Oreng ngowan se bagus, ehlas mate kaangguy ba-dumbana.

Wahyu 7:17 sabab Cacempe se alenggi e nga'-tengnga'anna tahta rowa se bakal ngowana reng-oreng jareya. Salerana bakal nontona reng-oreng jareya ka aeng se madhateng kaodhi'an. Ban Jehovah bakal ngessoda aeng mata dhari matana reng-oreng jareya.

Lukas 1:79 Salerana nyonare sakabbiyanna oreng se odhi' e dhalem papetteng ban katako'en. Nonton sengko' ban ba'na e jalan se noju ka kataremtemman.

2 Korintus 1:10 Salerana panyalamet kaula sadaja dhari babaja pate se raja ka'issa'. Ban Salerana jugan se masalamedda kaula sadaja dhaggi' e budhi are, sabab kaula sadaja ngarep ka Salerana.

Yahya 14:27 Ba'na edina'ana kataremtemman bi' Sengko'. Tang kataremtemman dibi' se bi' Sengko' ebagiya ka ba'na. Se ebagiya bi' Sengko' reya ta' padha ban baberri'na dunnya ka ba'na. Ja' ngalengsang, ja' tako'.

Filipi 4:7 Kalaban sapaneka, kataremtemman dhari Jehovah se ta' kera epahame manossa, bakal ajaga'a ate sareng pekkeranna sampeyan se ampon daddi settong sareng Isa Almasih.

Parompama'an - Bangsalan 3:24 Mon tedhunga ba'na ta' kera tako', mon

tedhung bakal ngeddha'a samalem benteng.

Jabur 4:8(9) Daddi abdidalem tedhung ngeddha sareng taremtem, sabab namong Junandalem, GUSTE, se mataremtem odhi' abdidalem.

Jabur 33:18 PANGERAN ajaga reng-oreng se ta'at ka dhabuna, reng-oreng se ngarep kataresna'anna.

1 Petrus 3:12 Sabab Pangeran ros-terrosan ngoladi reng-oreng se ngestowagi kasokanna, ban Pangeran ros-terrosan meyarsa'agi a-du'ana; tape Pangeran ngamoso reng-oreng se jahat lakona.

Roma 5:2 Polana parcaja ka Isa sampeyan sareng kaula sadaja eparenge Isa jalan kaangguy bisa ahayadi kataresna'anna Jehovah; ban sampeyan sareng kaula sadaja samangken paneka odhi' kalaban kataresna'an gapaneka. Daddi sampeyan sareng kaula sadaja perak polana gadhuwan pangarebban bakal arassa'agiya kasennengangan paparengnga Jehovah!

Yesaya 55:12 Ba'na bakal ondura dhari Babil kalaban ate se perak, sarta eater kalowar kalaban salamet. Gunong ban gumo' bakal peraga ban raksoragan, ka'-bungka'an e teggal padha pa'-kopa'an.

Lukas 19:40 Isa adhabu, "Paparcaja ba'na, ya! Mon reng-oreng rowa neng-enneng, to-bato reya tanto aera'."

Yahya 16:22 Bariya keya ban ba'na: Sateya ba'na sossa atena, tape Sengko' tatemmowa pole ban ba'na, daddi atena ba'na bakal peraga; ban tadha' oreng se bisa'a ngala' kaperagan jareya dhari atena ba'na.

Lukas 12:9 Tape pa'-sapa'a se e adha'na oreng bannya' mongker ja' aba'na Tang mored, bi' Pottrana Manossa bakal epongkerana keya e adha'na kat-malaekadda Jehovah.

Matiyus 10:30 Bariya keya bannya'na obu' e cethagga ba'na la ebitong kabbi.

Yesaya 54:10 Maske nong-gunong ban mo'-gumo' agundhek, Sengko' teptebba taresna ka ba'na. Tang parjanjiyan karokonan bi' Sengko' eteggu'a salanjangnga," jareya dhabuna PANGERAN se taresna ka ba'na.

Matiyus 24:35 Langnge' ban bume bakal mosna'a, tape Tang oca' bakal teptebba salanjangnga.

Matiyus 11:28-30 Mara nyander ka Sengko' ba'na kabbi se lesso, sarta nanggung berra'na odhi'; bi' Sengko' ba'na epaseggerra. 29 Mara toro' Tang parenta ban ajar dhari Sengko'. Sabab Sengko' reya alos ban andhap asor, daddi ba'na bakal arassa'a segger. 30 Sabab Tang parenta masenneng, ban kasossa'an se bi' Sengko' epekollagi ka ba'na dhammadang.

Sulaiman - Mastekana Junk-Kejungan 2:10 Edhingngagi, tang kakase adhabu ka sengko'. Lalake': Mara dha' enna', le', mara dha' enna'!

Hoseya 2:14,19,20 PANGERAN adhabu, "Daddi bi' Sengko' ebuna jareya egiba'a ka ra-ara; e jadhiya bi' Sengko' ecaca'ana bi' ca'-oca' parkara kataresna'an. 19 Isra'il, bi' Sengko' ba'na ekabineya, epadaddiya bine se essa salanjangnga. Bi' Sengko' ba'na ekataresna'ana saterrossa; Sengko' jujura ban estowa ka ba'na. 20 Menorot Tang janji, bi' Sengko' ba'na eneka'ana. Ban ba'na bakal ngakowa ja' Sengko' reya PANGERANna.

2 Korintus 11:2 Kaula ce' terrona se tapanggiya sareng sampeyan, akadi Jehovah se ce' terrona tapanggiya jugan sareng sampeyan. Sampeyan akadi paraban se gi' socce se bi' kaula ampon ejanjiyagi eneka'agiya ka lakena, enggi paneka Almasih.

Kolowaran 3:14 Dhabuna Jehovah, "Sengko' reya **SENGKO' BADHA.** Ba'na ngoca' kantha reya, Sengko' epakon entar ka ba'na bi' se asmana **SENGKO' BADHA.**

Ibrani 13:8 Isa Almasih paggun padha, gi' dhimen, samangken ban salanjangnga.

Hoseya 13:4 PANGERAN adhabu, "Sengko' reya **PANGERAN,** Jehovahna ba'na, se makalowar ba'na dhari Messer. Ba'na ta' andhi' Jehovah laen kajabana Sengko' malolo. Pera' Sengko' panyalamedda ba'na.

Caretana Para Rasul 4:12 Namong kalaban parantara'anna Isa oreng epasalamet. Sabab e antarana manossa sadunnya paneka tadha' oreng laen se narema kakobasa'an dhari Jehovah kaangguy masalamet panjennengngan sareng kaula sadaja.

Yahya 15:14 Ba'na reya Tang bat-sobat mon ba'na ngalakone apa se eparenta'agi Sengko' ka ba'na.

Yahya 14:6 Dhabuna Isa, "Sengko' reya jalan mon terro kennala ka Jehovah ban terro olleya kaodhi'an. Tadha' oreng se bisa entar ka Rama mon ta' lebat Sengko'.

Wahyu 3:20 Edhingngagi! Sengko' manjeng e adha'na labang, athokthogan. Mon badha se ngedhing Tang sowara, ban mokka'e labang, Sengko' tanto maso' atemmowa ban oreng jareya; Sengko' ngakana ban oreng jareya, ban oreng jareya ngakana abareng ban Sengko'.